

इवनिंग डोगरी न्यूज़ बुलेटिन

समे-18:15 Hrs

<><><><><><>

### Headlines

- 1 प्रधानमंत्री नरेंद्र मोदी होंरें आखेआ ऐ जे स्वच्छ भारत दे लक्ष्य गी हासल करने लेई लगातार यत्न करदे रौहना लाजमी ऐ।
- 2 देश दे बाकी हिस्सें आहला लेखा अज्ज जम्मू खिते च बी गांधी जयंती मनाई गई।
- 3 उपराज्यपाल मनोज सिन्हा होंरें आखेआ ऐ जे जम्मू-कश्मीर च चुनावं दा नमां इतिहास लिखेआ गेआ ऐ, लोकें बंदूकें गी छोड़ियै वोट दी ताकत गी समझी लेया ऐ।
- 4 महात्मा गांधी हुंदी जयंती दे मौके उपपर अज्ज युवा मामलें खेड्ड मंत्रालय नै पूरे दे च फिट इंडिया स्वच्छता फ्रीडम रन दे 5में संस्करण दी शुरूआत कीती।

<><><><><><>

### PM-Swachta

प्रधानमंत्री नरेंद्र मोदी होंरें आखेआ ऐ जे स्वच्छ भारत दे सुखने गी साकार करने लेई इक भेठा लगातार यत्न करने दी जरूरत उपपर बल दित्ता। स्वच्छ भारत मिशन दे 10 बरे पूरे होने दे मौके पर अज्ज नमीं दिल्ली च स्वच्छता ही सेवा 2024 कार्यक्रम गी संबोधित करदे होई मोदी होंरें स्वच्छता गी जन आंदोलन बनाने लेई 140 करोड़ भारतीयें दे अटूट भावना गी नमन कीता। उनें आखेआ जे अज्ज विश्व दे बक्ख-बक्ख हिस्सें च बक्ख-बक्ख कार्यक्रमें दा आयोजन कीता जा रदा ऐ। उनें आखेआ जे सेवा पखवाड़ा दे छड़े 15 दिनें च देश दे 27 लक्ख शा मते कार्यक्रम आयोजित कीते गे जेदे च 28 करोड़ शा मते लोकें हिस्सा लैता। प्रधानमंत्री होंरें आखेआ जे एह ध्याड़ा असेंगी

महात्मा गांधी ते देश दी होर दुइयें महान हस्तियें दे सुखने दे भारत गी सच्चाई च बदलने नेई प्रेरित करदा ऐ। मोदी होरें अज्ज स्वच्छता कन्ने जुड़े दे तकरीबन 10 ज्हार करोड़ रपे दे परियोजनाएं दी बी शुरूआत कीती।

<><><><><><>

### Swachhata Hi Seva

बक्ख-बक्ख सियासी पार्टियें दे लीडरें अज्ज राष्ट्रपिता महात्मा गांधी हुंदी जयंती दे मौके उप्पर उनेंगी भावें-भरोची श्रद्धांजलि दिंदे होई दिल्ली च बक्ख-बक्ख स्वच्छता अभियानें च हिस्सा लैता। मीडिया कन्ने गल्ल करदे होई बीजेपी दे राष्ट्रीय प्रधान ते केंद्री मंत्री जगत प्रकाश नड्डा होरें आखेआ जे महात्मा गांधी होरें स्वच्छता लेई आवाज चुक्की जेड़ी अज्ज जन आंदोलन च तब्दील होई गेदी ऐ। केंद्री मंत्री होरें सब्बनें लोकें गी इक्कजुट होइये एक स्वच्छ, खुश ते स्वास्थ्य भारत बनाने दे कम्म च योगदान देने लेई गलाया। मच्छी ते पशु पालन मंत्री राजीव रंजन सिंह होरें कृषि भवन च श्रमदान कार्यक्रम च शिरकत कीती। उनें गलाया जे स्वच्छता माहनू दे जीवन दा बड़ा गै महत्वै आहला हिस्सा ऐ। केंद्री मंत्री डॉ. जतिंद्र सिंह होरें बी अज्ज नमीं दिल्ली दे नेहरू पार्क च स्वच्छता ही सेवा अभियान च हिस्सा लैता ते एक पेड़ मां के नाम तैहत बूहटा लाया।

<><><><><><>

### Gandhi-Jayanti-Muskaan

गांधी जयंती दे मौके पर अज्ज जम्मू नगर निगम आस्सेया मानसिक तौरा पर चुनौतीपूर्ण बच्चें लेई छत्री रामा च बनाए गेदे मुस्कान घर च इक कार्जक्रम दा आयोजन कीता गेआ जेदे च जम्मू दे डिविजनल कमिशनर रमेश कुमार, जम्मू म्युनिसिपल कार्पोरेशन दे कमिशनर डॉ. देवांश यादव ते जम्मू दे अतिरिक्त डी.सी अनसुइया जम्वाल मौजूद हे। कार्यक्रम दी शुरूआत बूहटे लाने कन्ने कीती गई। इस मौके पर जम्मू म्युनिसिपल कार्पोरेशन दे कमिशनर डॉ. देवांश यादव होरें आखेआ।

<><><><><><>

## GGF-Jammu

गांधी ग्लोबल फैमिली जम्मू-कश्मीर नै ऐतिहासिक दीवान-ए-आम, मुबारक मंडी विरासती परिसर च राष्ट्रपिता हुंदी 155मीं जयंती मनाने लेई अज्ज इक्क कार्यक्रम आयोजित कीता। इस मौके पर प्रिजाइडिंग अफसर बने दे आई.ओ सोनी होरें होरनें मन्ने-परमन्ने दे लोकें दे कन्नै महात्मा गांधी होरें गी श्रद्धांजलि अर्पित कीती। इस मौके पर बोलदे होई आई.ओ सोनी होरें विद्यार्थियें गी शांतिपूर्ण जीवन जीने लेई अपने रोजमर्रा दे जीवन च गांधीवादी मूल्यें-कदरें गी अपनाने लेई आखेआ। उनें महात्मा गांधी हुंदे अहिंसा दे स्नेह ते मौजूदा समें च एहदे महत्वै पर बी लो पाई। इस मौके पर बोलदे होई स्काउट ते गाइड दे चेयरमैन एम.एम जोशी होरें आखेआ।

<><><><><><>

## Gandhi Jayanti Kishtwar

किश्तवाड़ जिले च गांधी जयंती गी मनाने लेई उत्थुं दे मुखश शिक्षा अधिकारी जावेद अहमद किचलू हुंदे दिशा-निर्देश पर तकरीबन 800 सरकारी ते प्राइवेट स्कूलें दे 40 ज्हार थमां मते विद्यार्थियें एहदे च शमूलियत कीती। इस ध्याड़े गी अहिंसा, शांति ते सामुदायिक सेवा दा सदा-सदा लेई रौहने आहले मूल्यें दे बढ़ावा पर ध्यान देने दे कन्नै गतिविधिं ते समारोहें दी श्रृंखला राएं महात्मा गांधी हुंदी जीवनी गी श्रद्धांजलि देइयै मनाया जंदा ऐ। सहाड़े जिला संवाददाता कैलाश नाथ हुंदे कन्नै गल्लबात करदे होई मास्टर चंद्र प्रकाश होरें आखेआ।

<><><><><><>

## Swachhta-Abhiyan udh.

साफ-सफाई ते टिकाऊ जीवन जीने दे सिद्धांतें लेई प्रतिबद्धता दे उल्लेखनीय प्रदर्शन च जिला कनूनी सेवाएं सरबंधी अथार्टी उधमपुर नै जम्मू-कश्मीर कनूनी सेवाएं प्राधिकरण दी अगुवाई च जिला अदालत परिसर उधमपुर च इक स्वच्छता अभियान चलाया गेआ। जिला कनूनी सेवाएं सरबंधी अथार्टी उधमपुर दे सब जज, सैक्रेटरी अजय कुमार शर्मा हुंदी दिक्ख-रिक्ख च स्वच्छता अभियान च अथार्टी दे स्टाफ मिम्बरें दी उत्साही भागीदारी दिक्खने गी थ्होई। मगरा जिला कोर्ट

थमां महात्मा गांधी हुंदी मूर्त दोमेल चौक तगर इक रैली कड्डी गई। मीडिया कन्नै गल्लबात करदे होई सेक्रेटरी DLSA ते सब जज उधमपुर अजय कुमार शर्मा होरें आखेआ।

<><><><><><>

### Gandhi Jayanti Poonch

राष्ट्रपिता महात्मा गांधी हुंदे सम्मान च पुंछ जिले दे शिक्षा इदारें च साफ-सफाई मुहिम ते सांस्कृतिक कार्यक्रमें दा आयेजन कीता गेआ। समारोहें दी अगुवाई करदे होई पुंछ दे मुख शिक्षा अधिकारी लाल हुसैन होरें स्वच्छता संगंध ते अभियान दी अपने दफ्तर थमां शुरूआत कीती। मुख शिक्षा अधिकारी हुंदे परिसर च सफाई-सुथराई दी पछौक्कड़ा च किट्टे होए दे कर्मचारिएं 'स्वच्छता' प्रति अपने धेइयै लेई संगंध लैती। पुंछ दे जेड.ई.पी.ओ विजय कुमार ते शिक्षा विभाग दे कई सीनियर अधिकारिएं बी इस मौके पर मौजूद हे। मुख शिक्षा अधिकारी लाल हुसैन होरें इस मौके पर साफ-सफाई दे महत्व पर लौ पांदे होई आखेआ जे एह इक रोजा दी गतिविधि नेई होइयै असेंगी साफ-सफाई बनाई रखने दे जत्त बरोबर करदे रौहना चाइदा।

<><><><><><>

### LG-JK

उपराज्यपाल मनोज सिन्हा होरें 10 बरे दे वक्फे परैत होए दे असेंबली चुनाएं च जम्मू-कश्मीर दे लोकें ते चेचा करी कश्मीर दे लोकें दा रिकार्ड गिनतरी च मतदान करने लेई मतदाताएं गी मुबारकबाद दिती ऐ। उनें आखेआ जे कश्मीर दे लोक हून वोट दे महत्व गी समझी चुके दे ना। राजभवन श्रीनगर च अज्ज गांधी जयंती दे मौके पर एल.जी होरें गलाया जे इनें असेंबली चुनाएं च रिकार्ड मतदान शांतिपूर्ण ढंगै सिर मुकम्मल होए ना। उनें आखेआ जे वोटरें ते मतदाताएं च बड़ा मता उत्साह दिखने गी लब्बा ऐ। एल.जी होरें आखेआ जे 1 करोड़ 40 लख लोकें वोट पाइयै जम्मू-कश्मीर च लोकतंत्र गी मजबूत बनाने च योगदान दिता ऐ। उनें आखेआ जे इत्थूं दा नौजवान बधी चढ़िये चुनां प्रक्रिया दा हिस्सा बनेया। एल.जी होरें गलाया जे इनें चुनाएं च लोकें एह जाहिर करी दिता ऐ जे हून ओह हथियारें ते पत्थरबाजी उप्पर भरोसा नेई करिये सगुआं मतदान राएं

अपनी जायज मंगें गी हल कराने च यकीन रक्खदे न। उनें नौजवानें गी राष्ट्र विरोधी तत्वे शा सतर्क रौहने लेई आखेआ।

<><><><><><>

### Youth-Affairs

राष्ट्रपिता महात्मा गांधी हुंदी 155 जयंती दे मौके उप्पर अज्ज युवा मामले ते खेड्ड मंत्रालय नै नमीं दिल्ली च फिट इंडिया स्वच्छता फ्रीडम रन दे 5में संस्करण दी शुरूआत कीती। 2 अक्टूबर गी शुरू होई दी एह द्रौड़ सब्बनें राज्यों ते केंद्र शासित प्रदेशों च आयोजित कीती जाग ते 31 अक्टूबर गी सरदार वल्लभ भाई पटेल हुंदी जयंती दे उपलक्ष्य च एह एह एकता द्रौड़ दे तौरा पर आयोजित कीती जाग। इस कार्यक्रम दी शुरूआत करदे होई युवा मामलें ते खेड्ड सचिव सुजाता चतुरवेदी होरें गलाया जे राष्ट्रपिता महात्मा गांधी होरें स्वास्थ्य जीवन लेई स्वच्छता दे महत्व उप्पर बल दित्ता। उनें आखेआ जे एह फ्रीडम रन महात्मा गांधी हुंदी शिक्षा ते सिद्धांतें थमां प्रेरित ऐ जेदा मकसद स्वच्छता मुहिम कत्रे जुड़िये स्वच्छ जीवन गी बढ़ावा देना ऐ। चतुर्वेदी होरें मथुरा रोड च मेजर ध्यान चंद राष्ट्रीय खेड्ड मैदान थमां स्कूली विद्यार्थियों दी द्रौड़ गी झंडी दस्सिये रवाना कीता। खेड्ड सचिव होरें स्टेडियम च रूक्ख-बूहटे बी लाए।

<><><><><><>

### MEA-Travel

विदेश मंत्रालय नै अज्ज भारतीय नागरिकें गी विजन कुसा जरूरी कम्म दे ईरान दा दौरा नेई करने दी सलाह जारी कीती ऐ। यात्रा सरबंधी परामर्श च मंत्रालय नै ईरान च रवारदे भारतीयें गी सतर्क रौहने ते तेहरान च भारतीय दूतावास दे संपर्क च रौहने दी सलाह दित्ती ऐ। मंत्रालय नै गलाया ऐ जे खित्ते दी मौजूदा सुरक्षा स्थिति उप्पर नेड़मीं तक्क रक्खी जा'रदी ऐ।

<><><><><><>